

Selain itu, di dalam surah Al-Baqarah ayat 269, Allah memfirmankan bahawa Dia akan mengurniakan hikmah kepada sesiapa yang Dia kehendaki. Dan, orang yang telah diberi kurnia hikmah itu samalah ertinya dengan mendapat anugerah yang sangat banyak. Hikmah diertikan orang juga kebijaksanaan, diertikan orang juga filsafat, diertikan orang juga mengetahui yang tersembunyi. Bangsa Indonesia pernah membuat satu ungkapan kata bahawa “hikmah” itu ertinya “mengetahui yang tersirat di balik yang tersurat”.

Bagaimana akan dapat dikeluarkan hikmah itu kalau kita tidak dibolehkan mentafsirkan Al-Quran di luar garis yang ditunjukkan oleh pendapat yang dipelopori Ibnu Taimiyah itu?

Ibnu Abbas pernah didoakan oleh Rasulullah s.a.w. supaya dia dapat memahami agama lebih mendalam dan mengetahui takwil atau tafsir. Di dalam Al-Quran, ada ayat yang terang-terangan menyuruh manusia supaya memohonkan kepada Allah agar ditambahi kiranya ilmu.

قُلْ رَبِّي زِدْنِي عِلْمًا

“Katakanlah, ‘Ya Tuhanku, tambahilah untukku ilmu.’”

Adapun ilmu itu sangatlah luasnya, sehingga berapa pun yang dimohonkan manusia, tidaklah cukup umurnya buat menampung ilmu yang sangat banyak itu. Orang-orang yang arif bijaksana, bila merenung Al-Quran, bukan sahaja akan mendapatkan ilmu agama, bahkan ilmu yang umum pun.

Imam Ghazali bukan sahaja mengemukakan dalil sebagaimana yang kita simpulkan di atas itu, bahkan mengatakan pula bahawa mentafsirkan Al-Quran hanya semata-mata di keliling Sunnah tidaklah mencukupi, kerana hadith yang ma'tsur dari Nabi s.a.w. dengan sanadnya yang shahih, yang mengenai tafsir Al-Quran sangatlah sedikit. Dan, tafsir dari sahabat-sahabat kebanyakan pula hanya dari pendapat mereka. Oleh sebab itu, kata Imam Ghazali, sebaliknya kita ikuti jejak sahabat-sahabat Rasulullah itu, iaitu membanting tulang dan memikirkan Al-Quran dengan mendalam pula, sehingga kita pun dapat mengeluarkan *ra'yi*, sebagaimana sahabat-sahabat itu pula. Demikian juga terhadap *tabi'in*.

Kata Imam Ghazali lagi, bila direnung pendapat-pendapat pentafsiran sahabat-sahabat dan *tabi'in*, nyata sekali dalam banyak hal mereka tidak bersamaan pentafsiran. Itulah bukti bahawa mereka telah memakai *ra'yi* sendiri di dalam mentafsirkan Al-Quran.

